


Vibrashon di Amor, Milager y Den bena di bida:

Autor Belen Kock- Marchena a conta un tiki di cada un di su bukinan di poesia



ORANJEŠTAD (AAN) -- Sra. Belen Kock-Marchena, juffrouw di school y autor di poesia, a publica tres buki te aworaki.

Durante e anochi di encuentro cu e miembronan di Club di Buki, Belen a conta tocante su publicacionnan aki.

El a cumenza pa comenta cu sra. Joyce Pereira, cu ta un autoridad den Idioma Papiamentu, ta e persona cu a haci coreccion di idioma di su manuscrito, y el a haci esaki cu hopi cariño.

Vibrashon di Amor ta e prome buki cu Belen a publica. El a comenta un poco tocante e diferente temanan cu e ta trece dilanti den forma di poesia, pero na dado momento

el a puntra su mes pakico si e ta stima su mama asina tanto, e no a skirbi un poema p'e. E ora ey el a pidi Dios dune inspiracion y esey a sosode. E ta corda cu di un Diasabra pa Diadomingo e no por a drumi y pa 5'or di madrugada el a lanta, tuma un papel y un pen, cumenza skirbi sinta den sala, palabra tras di otro. E poema pa su mama tabata e ultimo cu el a skirbi y el a bin na prome den su prome publicacion di poesia "Vibrashon di Amor". Belen a relata cu ora el a caba el a cumenza yora pasobra el a pensa cu no ta e, a skirbie. E ta sinti cu esey ta berdad. Na aña 1998 Belen a publica su di dos tomo di poesia yama "Milager" cu a wordo hopi

bunita traduci pa sra. Madona Stevens na Ingles: "Miracle". Zuster Juliette a pone e poema aki masha bunita den un cuadro y a regala Belen esaki. E autor a menciona cu e buki aki ta di berdad un milager y tin masha bunita storia rond di dje.

Entre otro, Zuster Juliette a pidie pa skirbi un poema riba scol tur luna, pa e siguiente aña escolar e momento ey.

Belen a contesta Zuster Juliette cu e no por traha asina, cu e mester di inspiracion pa skirbi. Zuster a bise cu esun cu a mande pidi'e ta bay yude.

Belen a bay Hulanda cu vacacion, cerca su yiu Romeo, y aya el a pasa den un experiencia hopi bunita cu a sirbi' di inspiracion pa skirbi e poema "Milager" pero el a lubida riba e peticion di Zuster Juliette.

Zuster a bin cerca dje cord'e cu un bez aki scol lo cumenza. El a bise tambe cu e tin un poema pero cu e no por comparti cune pasobra ta algo personal.

Toch Zuster Juliette a pidi'e pa lagu'e les'e. Nan a bay den camber y Zuster a lesa e poema y a gust'e masha hopi y

bis'e cu esey ta netamente e poema pa cumenza aña escolar cune, pasobra ora e maestra acepta e mucha manera cu e ta, e milager ta nace.

Ora aña escolar cumenza semper scolnan Catolico ta celebra un Santo Sacrificio di Misa. Ora nan a yega Misa, Zuster a duna Belen un programa cu tabata tin un pintura riba dje. E pintura aki tabata un interpretacion di su poema y den Misa el a wordo masha bunita declama pa Sonia, e persona cu a traha e pintura. Ora misa a caba Sonia a bin braza Belen y bise: "Esta bunita bo a interpreta mi pintura". Belen di cune: "Sonia, a mi no a mira bo pintura"... A bin resulta cu ni Belen a wak e pintura prome ni Sonia a lesa e poema di antemano.

Belen a expresa cu ora Dios kier pa bo haci algo p'e e ta manda tur elemento hunto, manera a sosode cu e poema aki, cu ta un Milager di berdad!

"Den bena di bida", publica na 2001 ta Belen su di tres obra poetico. Esaki a wordo traduci, hopi bunita, na Hu-

landes pa sra. Ria Petrona. Y e di mas bunita ta cu Belen su yiu di mas chikito a traha e portada di e buki aki.

Belen a menciona cu tur e bukinan a wordo bendi masha lihe mes.

Un momento masha bunita ta ora e presentenan mes a pidi Belen pa reclama algun di su poesianan, y esaki a sosode den un ambiente sumamente agradable. Pabien Belen, cu un presentacion asina sublime, y cu a haci e lectornan pidi'e pa haci un compilacion di tur su tres bukinan, mirando cu no tin na benta ni un ehemplar mas, y tambe a sugeri'e pa tuma e reto di traha un storia pa mucha. E no a descarta e idea aki, pero e ta sinti cu esun yama pa skirbi storia pa mucha ta su casa Dolfi Kock. Belen a wordo acompaña durante su declamacionnan pa e guitarrista sr. Kock cu a haci un tremendo presentacion y tambe su nieta a toca na violin su mesun inspiracion pa e poema cu Belen a declama na ultimo cu ta e poesia dedica na su mama.